

Diamars otro siman na Theresita Center:

Experto Ton Jansen lo ta na Aruba pa informa ampliamente riba fast ferry

ORANJESTAD (AAN) – Minister di Transporte, Comunicacion y Sector Primario sr. Chris Romero, a elabora ampliamente riba e proyecto di Fast Ferry, den conferencia di prensa Diahuebs mainta.



E mandatario a menciona cu e proyecto aki a drenta den un fase unda nan lo trece un experto for di exterior, sr. Ton Jansen, cu lo bin Aruba pa duna mas informacion riba e diferente desaroyonan al respecto.

E dignatario a indica cu e proyecto aki ta algo positivo y cu estudionan a wordo haci, adecuadamente, y asina lo bay rebiba e proyecto aki.

Minister Chris Romero a señala na aña 2006 e proyecto aki no a cana e caminda manera mester ta, y esaki a pone cu hopi persona no a kere mas den dje. No obstante, Gabinete Wever-Croes ta para cien por ciento tras di e proyecto, y a cuminsa cana e caminda necesario. Esaki a trece cune cu e mandatario ta treciendo e experto di afo, y otro siman nan lo bay na diferente stakeholders concerni, y asina cuminsa informa y haya nan feed back y asina wak unda por surgi cierto

problemanan y resolve nan rapidamente.

Entre otro, tin riba schedule caba reuni cu Inmigracion, Douane, lo informa Parlamento un biaha mas, mirando cu for di 2017 tin un constelacion nobo cu lo wordo informa. Tambe otro siman, Diabierna, nan lo bay Consejo di Minister pasobra ta bon cu un bez cu nan caba di informa tur stakeholders concerni, haya e aprobacion completo di Consejo di Minister pa asina aki por sigui cana y tuma e siguiente pasonan.

Entre otro, e mandatario ta haciendo afspraak cu Camara di Comercio y Industria. Tambe cu Refineria di Aruba (RdA) pa wak e terenonan disponible unda cu un di e plannan

ta pa kibra un parti di e muraya pa asina e pueblo di San Nicolas tin un bista bek riba lama, y esey tambe ta algo positivo pa tin un aire nobo eybanda.

E dignatario a agrega cu tambe lo sinta cu CITGO pa asina informa nan, pasobra Aruba tin su refineria caba pero no por ta asina cu un fast ferry por stroba e maneho aki.

E mandatario ta convenci cu nan por bay man cu man sin cu tin problema. ATA y AHATA tambe ta instancianan cu cualnan nan lo reuni y ademas e Asociacion di Time Share, entre otronan concerni.

Minister Romero a expresa cu otro siman lo ta un siman basta pisa, den sentido di informa pueblo y e

stakeholders concerni pa nan wak cu e proyecto di Fast Ferry ta algo serio y positivo. Un fast ferry lo trece un bida completo y nobo y un aire fresco pa San Nicolas, pero Aruba completo lo bay beneficia di dje pasobra no solamente e ta bay engrandecé nos turismo, pero ta bay crea un pilar economico den e comercio di e Islanan di Aruba, Curacao y Bonaire. “Kiermen, e ta un concepto sigur hopi positivo y durante e presentacionnan nos lo bay trece mas informacion, kico e fast ferry ta, kico e ideanan tras di dje, y kico ta e negoshinan y economia cu por crece si tin un fast ferry den San Nicolas, particularmente”, e dignatario a expresa.